



Minister Benny Sevinger:

Ehecucion di vision pa un miho Aruba ta sigui cu construcccion di Welcome Plaza

Renobacion y mehoracion di producto ta dunando resultado

E SIMAN aki a habri Aruba cu inicio di construcccion di otro proyecto cu lo beneficia nos pais no solamente como destino turistico, pero tambe pa su pueblo. Riba su fecha natal, Minister Benny Sevinger a compaña colega Minister President Mike Eman y Minister di Turismo Otmar Oduber pa haci e groundbreaking di e Welcome Plaza. E obra aki ta ubica riba L.G. Smith Boulevard na entrada di waf di Oranjestad. Pa e titular di Infraestructura, e proyecto aki ta representa e continuacion di ehecucion di vision Gabinete Mike Eman I y II respalda pa e determinacion di su lideman, e sosten di pueblo y e resultadonan di nos sector turistico.

BoAruba ta e plan macro cu prepara pa asina, no solamente rescata Aruba di e descuido total cu tabata aden, pero tambe stimula e economia local. Despues di a renoba Caya Principal y varios di su edificacionan di importancia cultural, historico y monumental, a yega na beurt pa drecha y embecece e entrada y salida di nos turistanan

crucero. E segmento aki di nos industria turistico a crece danki na e bon trabou di colega di turismo, segun Minister Benny Sevinger y esey ta motibo riba su mes pa continua cu e trabounan. "Cifranan di turismo den ultimo aña a subi y esey ta nifica cu e trabou di renobacion y mehoracion di producto ta dunando resultado y ta treciendo mas bishitante y pesey mester sigui cu esaki," e titular di Infraestructura a comenta.

Ta bon pa señala adicionalmente, cu un bes cla, Welcome Plaza su diseño ta bay yuda regula e actividadnan comercial den e area. "E renobacion no mester ta solamente fisico, pero tambe den logistica. Taxi y operadornan di tour mester tene cuenta cu movecion di turistanan pa centro di ciudad, tram, kiosk, publico, etc. Tin un plan prepara hunto cu Departamento di Obran Publico, Aruba Ports Authority y otro instancianan cu poco poco ta implementando," tabata e palabranan di Minister Sevinger.

Prome cu clausura su turno na e ceremonia di groundbreaking, Minister



Sevinger a gradici tur hende cu ta traha den e proyecto aki, esta InfraTeam, DOW, DIP, APA, FDA y Arubaanse Wegenbouw cu ta e contratista encarga.

El a bisa: "Ta spera cu tur cos bay bon y segun plan pa na final sigui renoba nos pais cu lo trece mas turista y lo trece mas ingreso. Laga nos cuminsa traha."

Minister Otmar Oduber

Trabounan cu a inicia mas cu 5 aña pasa ta wordo refleha awe cu inicio di Welcome Plaza



DIALUNA mainta Prome Minister Mike Eman hunto cu Ministernan Benny Sevinger y Otmar Oduber, Wegenbouw, DOW, APA y demas invitado tabata presente na entrada di waf pa asina duna inicio na e 'ground breaking' di loke lo bira Welcome Plaza.

Minister Oduber a duna di conoce cu trabounan grandi a wordo haci e ultimo cinco añanan basa riba e vision di Prome Minister Mike Eman. El a indica cu consistencia ta loke mas ta resalta, un vision no for di momento cu Gabinete Mike Eman I a sinta, pero for di oposicion a mira tanto Premier Eman como Minister Sevinger ya caba na Cas di Partido planificando, planeando, pensando kico ta bay haci na e momento cu asumi e responsabilidad.

E mandatario a sigui splica cu consistencia a resalta pasobra a cuminsa cu e trabounan cu a wordo planifica. "Nos a bay FCCA splicanan na 2009 unda nos ta bay ta para na 2012, 2013, 2014 y awe. Tankin cu tabata poni akinan a wordo elimina. A traha riba Caya Grandi, a termina Caya Grandi, a percura pa un tram bin. Hopi hende por a cuestiona, pero minister a bisa na diferente ocasion, tabata e yabi pa por a sinta na 2009 cu e doñan di tur e barconan aki cu nos a wak henter aña 2013 y 2014, no durante un periodo so, inclusive den e lunanan cu antes no tabatin barco practicamente ta bin Aruba. Nos a convencen di e proyecto di Caya Grandi su tram cu tabata un fenomeno unico den Caribe. Nan a bin Aruba, nan a mira e desaroyo di e lugar, compromete